

# INUIT ATAQATIGIIT INATSISARTUNI



UKA2022/Imm. 131  
Oktobarip 25-at 2022

## **Uunga siunnersuut:**

Maannakkut angajoqqaajunissamut piginnaasanik misissuisarnerni Kalaallit angajoqqaajusut kulturikkut oqaatsitigullu allaaqutit ilumut naammaginatsumik isiginiarneqartarnersut aammalu angajoqqaatut piginnaasanik nalilersuisarnermut kulturikkut qanimut periutsinik ineriartortitsisoqarsinnaaneraniq periarfissaqarnersoq ersarissaasoqarnissaa anguniarlugu Naalakkersuisut Rigsmyndighed attaveqarfissagaa pillugu Inatsisartut aalajangiiffigissassaattut siunnersuut. (Inatsisartunut Ilaasortaq Anna Wangenheim, Demokraatit)

## **Oqaaseqaat:**

Meeqqat kalaallinik angajoqqaallit, Danmarkimi najugaqartut, meeqqat danskinik angajoqqaalinnut sanilliullugit akulikinnerujussuarmik angerlarsimaffiup avataanut inissinneqartartut ilisimaneqarpoq.

Pissutsillu tamaanneri pillugit 2021-mi misissuititsisoqarpoq.

Misissuisoqarneranut VIVE (Det Nationale Forsknings- og Analysecenter for Velfærd) ingerlatsisuuvoq – misissuinerullu inerniliussai nalunaarummi 2022-mi Majip qaammataagaa saqqummiunneqarlutik.

Misissuinerup paasinarsisippaa ilaqutariit sagsbehandlerillu akornamminni suleqatigiinnerat tamatigut pitsaasumik ingerlanneqartarsimangitsoq.

Angerlarsimaffiup avataanut inissiisoqartarnerinut suliat ilaatigut paaseqatigiiffiunngitsumik, kukkuluttoorfiusumik, immikkoortitsinerit – siorasaarinerlu allaat atorlugit – suliat ingerlanneqartarsimasimasut oqaatigineqarpoq.

Siunnersuuteqartup nammineerluni aamma eqqaavaa Mentor Immmanuel

# INUIT ATAQATIGIIT INATSIARTUNI



tunngasoq. Tassanilu qaqilersorneqartut oqariartuutigineqartullu pillugit ernumassuteqarnera ilaliinnarsinnaavarput.

Uppernarsarneqarpoq kulturikkut assigiingiffiit oqaatsitigullu aporfeqarnerit, paasinnittaatsikkut isiginnittaatsikkullu pissutsit – kiisalu tunngaviit allat aamma peqqutaallutik – meeqqat pineqartut pillugit suliat – paaseqatigiiffiunngitsumik isumaqatigiiffiunngitsumillu arlalitsigut ingerlanneqartarsimasut. Assigiinngissitsinerit pisarsimasut soorunami akuersaarneqarsinnaanngillat.

Naalakkersuisut danskit naalakkersuisorisimasaasa ilaannik siornatigut ataatsimeeqateqarsimallutik oqariartuuteqarput.

Pissutsillu tamakku pillugit – siunissamilu taamaaginnannginnissaat qulakkeerumallugu – Naalakkersuisut iliuuseqaqquneqarput. Iliuuseqartoqarnissaanullu noqqaaneq Inuit Ataqatigiinniit taperserparput.

Maluginiarparpullu iliuuseqartoqarnissaannut atatillugu Naalakkersuisut aamma allannguutissatut siunnersuuteqarmata. Isumaqarpugut piaartumik iluarsiisoqarnissaa eqqarsaatigalugu – naalakkersuisut siunnersuutaat aqqutissaasoq.

Kisianni suli sukumiinerusumik – ilaatigullu misissuinermi qulaajarneqartut suli annertunerusumik – ataatsimiitsitaliami susassaqartumi sammineqarnissaat pisussusissamisoorluinnartuusoq aamma isumaqarpugut.

Assigiinngissitsisarnerit – immikkoortitsisarsimanerillu nalaanneqartarsimasut pillugit – siunissamilu pissutsit taamaattut peqqittannginnissaat qulakkeerumallugit – inatsisitigut allatigullu illersugaanerulernissaat

# INUIT ATAQATIGIIT INATSISARTUNI



angujumallugu Naalakkersuisut Naalagaaffiup Oqartussaasuinut saffiginnissuteqassasut suliakkerusuppagut.

Taassumunngalu atatillugu uku pingaarnertut eqqarsaatigivagut:

- Ilaqutariit siusissukkut ikorfartorneqarnikkut aqutissiuunneqarnissaallu ikiorserneqartalernissaat – pitsaaliuneq anersaaralugu – qitiutinneqarnerulissasoq, takussutissaqartarmat ullormiit ullormut arsaarinninneq – pitsaaliuneq ingerlanneqarsimanngitsorluunniit – pisarsimasoq.

- Oqaatsitigut kulturikkullu assigiinngissutsit eqqummaariffiqineqarnerulernissaat sulissutigineqassasoq - piginnaasanik misissuisarit matumani pingaarnertut eqqarsaatigalugit

- Nutserisoqartussaataaneq pisinnaatitaaffiuvoq – tamakkiisumilli atorneqarneq ajorluni. Tamanna tamakkiisumik atorneqartalernissaa sulissutigineqassasoq.

- Suliat pineqartut pillugit nakkutilliisussaataaneq annertunerujussuamik ingerlanneqartalernissaat sulissutigineqassasoq – tassuunakkut qulakkeerneqaqqullugu ilumut inatsisit tunngaviusut malillugit sulisoqartarnersoq. Tamatigummi tamanna pisarsimanngilaq, ilaannilu eqqoriaanerit atorlugit sulianik ingerlatsisoqartarsimasoq oqariartuutigineqartarmat.

- Angerlarsimaffiup avataanut inissiisoqarnermi – pineqartut kulturikkut, oqaatsitigut, ilaqutariittullu attaveqarnerit attatiinnarlumallugit periarfissarititaasut pitsaanerpaaffissaaniitsinneqarnissaat

# INUIT ATAQATIGIIT INATSIARTUNI



qulakkeerniarneqassasoq – matumanilu immikkut ikorfartortit aamma  
eqqarsaatigalugit.

- Tunngavissaqanngitsumik siorasaarinerillu atorlugit angerlarsimaffiup  
avataanut inissiisoqartarsimaneranut pasitsaassaqarnermi suliat  
misissuisorneqassaat kaammattuutigineqassasoq.

Qulaani qaqilersukkagut – allanik aamma ilaartorneqarsinnaapput. Kisianni  
ataatsimiitsitaliami susassaqartumi pimoorullugit itisilerluarlugillu  
ataatsimiitsitaliap suliaqarnissaa innersuussutigalugu – taama oqaaseqarluta  
siunnersuutip ataatsimiitsitaliamut susassaqartumut  
suliassanngortinneqarnissaa inassutigaarput.